



Broj: 06-04-7593/26
Sarajevo, 13.03.2026.godine

SKUPŠTINA KANTONA SARAJEVO -OVDJE-

Predmet: Izjašnjenje na zastupničku inicijativu zastupnika Selmanović Faruka, dostavlja se

Zastupnik Faruk Selamanović je na 29. radnoj sjednici Skupštine Kantona Sarajevo, održanoj 06.03.2026. godine, u okviru tačke dnevnog reda "Poslanička/zastupnička pitanja, inicijative i odgovori" uputio zastupničku inicijativu koja glasi:

"Na osnovu člana 213. Poslovnika Skupštine Kantona Sarajevo, upućujem inicijativu Vladi Kantona Sarajevo radi hitne izrade i upućivanja u skupštinsku proceduru Zakona o kulturi sjećanja i zaštiti sjećanja na poginule borce, branitelje i šehide u periodu agresije na Bosnu i Hercegovinu, kao i izrade pratećeg seta podzakonskih akata neophodnih za njegovu punu implementaciju.

Obrazloženje - Kultura sjećanja na šehide, poginule borce i branitelje koji su svoje živote dali za odbranu Bosne i Hercegovine predstavlja jednu od temeljnih vrijednosti savremenog bosanskohercegovačkog društva. Njeno očuvanje nije samo pitanje historijske memorije, već i institucionalne odgovornosti prema onima koji su branili suverenitet, teritorijalni integritet i ustavni poredak države Bosne i Hercegovine. U prethodnom mandatu Skupštine Kantona Sarajevo zastupnici su već podnosili inicijativu sličnog sadržaja, međutim do danas nisu poduzeti konkretni koraci koji bi rezultirali donošenjem sistematskog zakonskog rješenja kojim bi se na institucionalan način uredila oblast kulture sjećanja. U posljednjem periodu svjedočimo društvenom i političkom ambijentu u kojem se sve češće paušalno i bez jasnih kriterija pristupa promjenama naziva ulica, javnih objekata i drugih javnih površina, uključujući i one koje nose imena šehida i heroja odbrane Bosne i Hercegovine. Paralelno s tim, u javnom prostoru se sve češće otvaraju rasprave u kojima se preispituje doprinos i senioritet šehida i boraca, što dugoročno može dovesti do relativizacije historijskih činjenica i podrivanja tekovina antifašističke borbe Armije Republike Bosne i Hercegovine. Takav pristup nosi ozbiljan rizik za očuvanje kulture sjećanja, ali i za vrijednosni sistem na kojem počiva savremena država Bosna i Hercegovina. Zbog toga je potrebno donijeti poseban zakonski propis (lex specialis) kojim bi se na jasan, transparentan i institucionalan način uredila zaštita kulture sjećanja na šehide i poginule borce, te spriječila proizvoljna i populistička praksa u postupcima imenovanja ili promjena naziva javnih prostora koji nose njihova imena.

Stoga predlažem da Vlada Kantona Sarajevo i Ministarstvo za boračka pitanja Kantona Sarajevo:

1. Pokrenu proceduru izrade Zakona o kulturi sjećanja i zaštiti sjećanja na poginule borce, branitelje i šehide u periodu agresije na Bosnu i Hercegovinu, kao posebnog zakonskog propisa (lex specialis)

2. U okviru izrade zakona definišu jasne kriterije, procedure i institucionalne mehanizme zaštite imena šehida i heroja odbrane Bosne i Hercegovine, posebno u postupcima imenovanja ili izmjene naziva ulica, javnih objekata i javnih površina.

3. Predvide sistemsku zaštitu spome-obilježja, memorijalnih lokaliteta i drugih obilježja posvećenih šehidima i poginulim borcima, uključujući njihovo održavanje, evidenciju i institucionalnu brigu.

4. Uspostave mehanizme institucionalnog nadzora nad primjenom zakona, kao i odgovarajuće mjere u slučaju nepoštivanja njegovih odredbi.

5. O poduzetim aktivnostima i planu izrade zakonskog rješenja dostave pisani izvještaj Skupštini Kantona Sarajevo.

Donošenjem ovakvog zakonskog rješenja Kanton Sarajevo bi poslao jasnu poruku da institucije ovog kantona preuzimaju odgovornost za očuvanje kulture sjećanja i trajno poštovanje prema onima koji su svoje živote utkali u temelje države Bosne i Hercegovine.”

Na pokrenutu zastupničku Inicijativu dajemo slijedeće

I Z J A Š N J E N J E

Ministarstvo za boračka pitanja Kantona Sarajevo vrši upravne i stručne poslove utvrđene Ustavom, zakonom i drugim propisima u oblasti ostvarivanja prava članova porodica šehida, članova porodica poginulih, umrlih i nestalih branioca, ratnih vojnih invalida i članova njihovih porodica, dobitnika ratnih priznanja i odlikovanja i članova porodica poginulih, umrlih i nestalih dobitnika ratnog priznanja i odlikovanja, demobiliziranih branioca, dobrovoljaca, organizatora otpora, veterana, ratnih vojnih zarobljenika i lica koja su kao maloljetna stupila u Oružane snage R BiH, kao lica zaslužnih u odbrambeno-oslobodilačkom ratu sa područja Kantona Sarajevo, kao i vođenje i podržavanje aktivnosti na očuvanju tekovina odbrambeno-oslobodilačkog rata 1992-1995. godine, održavanju manifestacija i drugih sličnih projekata.

Shodno upućenoj inicijativi, Ministarstvo za boračka pitanja Kantona Sarajevo ističe da u potpunosti podržava ovu inicijativu i ujedno Vas informišemo da će isto poduzeti neophodne aktivnosti u smislu formiranja radne grupe za izradu Zakona o kulturi sjećanja i zaštiti sjećanja na poginule borce, branitelje i šehide u periodu agresije na Bosnu i Hercegovinu, podzakonskih akata neophodnih za njegovu implementaciju, kao i organizovanje sastanka članova radne grupe, predstavnika braniteljske populacije i drugih stručnih lica, a u cilju utvrđivanja načina realizacije ove inicijative, odnosno izrade adekvatnog propisa.

S poštovanjem,

Dostaviti:

- Predsjedavajućem Skupštine Kantona Sarajevo,
- Zamjenici predsjedavajućeg Skupštine Kantona Sarajevo x3,
- Ⓒ Službi za Skupštinske poslove Kantona Sarajevo,
- Stručnoj službi Vlade Kantona Sarajevo,
- A/a.

